

■ COLUMNA

Quest coga velo

DAD ERWIN ARDÜSER*

Questa stad ha mes aug pudì festivar ses 80avel anniversari. Er en quest lieu: Cordiala gratulaziun e tut il bun. Durant la festina eran preschents confamigliars, amis ed enconuschents. En buna cumpagnia e cun in magiel vin è vegnì fatg viva e discutà da quai e tschai: Co vinavant cun il coronavirus? Stritgar il «C» da la PCD u betg? Tgi enconuscha ils megliers lieus per bulieus? E lura è er il velo stà in tema.

Da mes emprim velo ma regord jau anc bain. Ina damaun era quel davant chasa. In cotschen per mai ed in verd per mes frar. Durant las vacanzas da stad avevan nus gi l'incumbensa da far laina, tagliar e resgiar roma per il cheminé. Sco pajaglia hai lura dà in velo. Quel ha accumpagnà mai durant onns. Per ir a scola, per ir al trenament da ballape ed ina u l'otra giada hai jau era stuì far diever dal velo per arrivar al plaz d'emprendissadi, la damaun cura ch'jau aveva durmì giu e laschà mitschar il collega da lavur cun ses auto ch'era normalmain mes taxi fidà. La via era stippa e la saira vegniva mes bab cun l'auto per transportar a chasa mai e mes velo.

Da mes segund velo ma regord jau anc bain.



In velo da cursa blau da la marca «Koga». Tar l'equipament tutgavan era chalzers speziels, guants, ina chapitscha cun pala, in tricoc ed ina chautscha curta pulstrada. Da raschun avevan Urs Freuler, Tony Rominger ed Alex Zülle – stars svizzers da la scena da velo da quels onns – sveglià en mai l'ambiziun da guadagnar il Tour de France, ubain almain da participar a la cursa da Glion a Val. Ni l'in ni l'auter è capità. Era cun chautschas pulstradas n'ha mes tapun betg supportà ils strapatschs sin quest coga velo. Suentar curt temp è el perquai sva-nì giu en tschaler nua ch'el spetga anc oz sin megliers temps u forsa plitost sin in meglier velocipedist.

Erwin, quai fiss segir er Einsatzge per tai» ha manegia ina persuna che seseva a maisa cun mai durant la festina d'anniversari.

«Quai va uschè tgunsch e ti pos far turas fin 100 kilo-

meters senza strusch vegnir stanchel. Jau na dess mai pli davent el.» E la persuna n'era betg la suletta che ludava fin sum ses e-bike. Guardond en la runda hai jau prest survegnì nauscha conscienza perquai ch'jau n'hai nagin, gea gnanc anc empruvà da seser sin in tal velo.

Mez terz velo na fa betg lungs viadis. El stat en chasa e na sa muventa betg. Durant ils ultims mais hai jau puspè fatg dapli cumpagnia ad el. Grazia al coronavirus lavur jau magari a chasa, ed uschia datti era dapli muments per duvrar il hometrainer. Jau na dovrel ni chalzers ni vestgadira speziala, jau na stoss betg prender resguard sin l'aura, il privel d'accidents è minimal ed era quai che pertutga il mantegniment è quest apparat fitg nunpretensius. Durant ch'jau fatsch intgins kilometers poss jau ultra da quai era guardar in film, tadlar las novitads, leger in cudesch ubain la gasetta.

Considerond ils avantats e dischavantats tranter e-bike e hometrainer sun jau vegnì a la conclusiun d'anc spetgar cun la cumpra dal quart velo.

* Erwin Ardüser abitescha a Laax e lavura en l'administraziun dad RTR.